

## PBAPP kutip RM50 juta melalui JomPAY dari Jan - Jun 2020



24/07/2020 05:52 PM

GEORGE TOWN, 24 Julai -- Perbadanan Bekalan Air Pulau Pinang Sdn Bhd (PBAPP) telah mengutip RM50 juta melalui pembayaran dalam talian JomPAY dari 1 Jan hingga 30 Jun tahun ini, kata Ketua Pegawai Eksekutif PBAPP Datuk Jaseni Maidinsa.

Jaseni berkata pelanggan PBAPP telah menggunakan kemudahan JomPAY sejak ia diperkenalkan sebagai satu daripada saluran pembayaran pada Januari tahun lalu, dengan RM69 juta bayaran telah dikutip dari 1 Jan hingga 31 Dis tahun lepas.

"JomPAY melalui pembayaran perbankan dalam talian adalah saluran bayaran utama PBAPP bagi 'pembayaran tanpa sentuh' semasa berdepan pandemik COVID-19. Kemudahan ini memberi faedah kepada 631,250 pengguna air berdaftar dengan akses perbankan dalam talian di Pulau Pinang," katanya dalam kenyataan di sini hari ini.

Beliau berkata untuk menggalakkan lebih ramai pengguna PBAPP menggunakan JomPAY, PBAPP dengan Payments Network Malaysia Sdn Bhd (Paynet), pengendali JomPAY, dan bank utama JomPAY PBAPP, CIMB Bank melancarkan kempen JomPAY & Win pada Januari 2020.

Di samping itu, Jaseni berkata pelanggan juga boleh membuat bayaran mereka melalui aplikasi mudah alih MyPBA, Pos Malaysia, kiosk Paylink, ATM dan agensi pungutan yang dibenarkan seperti Happy Mart.

-- BERNAMA